

四庫全書

集部

欽定四庫全書

集部
元詩選三集卷一

詳校官中書臣王鵬

主事銜臣徐以坤覆勘

總校官編修臣王燕緒

校對官編修臣何循

謄錄監生臣丁楷

欽定四庫全書

元詩選三集卷一

庶吉士顧嗣立編

麻草貽溪集

草字信之臨晉人父秉彝登金皇統九年進士

第歷官兵部侍郎草生中條王官五老之下長

侍其先人西觀太華迤邐東游至洛遂避地家

焉北渡後嘗自代門踰代嶺之北留滯居延已

亥夏赴試武川夏秋歸道渾水訪劉祁京叔于

渾源登龍山絕頂自作遊記隱居教授而終人
稱為貽溪先生有詩文行世信之正大中與張
澄仲經杜仁傑仲梁隱內鄉山中日以作詩為
業遺山元好問裕之評仲梁詩如偏將軍將突
騎利在速戰屈于遲久故不大勝則大敗仲經
守有餘而攻戰不足故勝負略相當信之如六
國合從利在同盟而敝于不相統一有連雞不
俱棲之勢雖人自為戰而號令無適從故勝負

未可知當時以為知言當金源北渡後裕之首
為河汾倡正學時信之與張宇彥升陳賡子颺
庚子京房皞希白段克己復之成己誠之曹之
謙益甫諸老與裕之游從宦寓中一時雅合並
以詩鳴元大德間大同路儒學教授房祺自號
橫汾隱者纂錄信之等八人編集成帙得古律
詩二百一首號曰河汾諸老詩集明副使濮澤
車璽稱其詞藻風標如層峰盪波金堅玉瑩絕

無突梯脂韋之習纖靡弛弱之句錄此亦足見
金源一時河汾詩學之盛雖易世不衰云

上雲內帥賈君

北極長虹掣西垣太白高千年知運圯四海共兵塵霧
黑龍蛇鬪山昏虎豹嗥石傷填海羽波動負山鼃遺介
潛寒渚驚鷗走夜牢江山留慘黯天地入煮蒿衆折思
枝柱初寒俟繭繅明良逢慶會鄉曲得名豪梁棟因人
出餘艱為世操安流欣鼓枻奔浪獨能篙日出戈揮景

江翻弩射濤風聲連河洞裁鑒悉纖毫桃李勤封植茅
菅日雉薊獵場游麕鹿魚渚動鰭魴井邑生春色禾麻
飫土膏民歌烏遠屋士喜馬騰槽朔塞閑刁斗天山擁
節旄岱嵩何落落江漢自滔滔大寶珠仍壁長城雉與
壕崇牙分檠戟大壤屬鞭橐日月依龍德風雲挾豹韜
夾山羣戰騎黑水泳輕舠落日觀魚浦秋風射雉臯化
行家置塾役簡里停鑿歌奏投壺室文閑治獄曹西菴
談性理東閣會奇髦森爽開璜琥縱橫列雁羔禮容新

泮宇物性遂莊濠牧唱聞朝起樵音聽暮號孤嬰收坎
阱流滯起蓬蒿屢下陳蕃榻誰空北海醪邵軍敦禮樂
曹館富風騷客望龍門聚雛從鳳穴翱世知三窟隘人
可二天逃雨露承恩命山河襲世勞功名高衛霍輔弼
慕伊咎鞍馬憐髀肉簪纓視鬢毛雅中張仲德頌入魯
侯昭有客傷淪落無堦寫鬱陶太行雲幕幕代北雨騷
騷去國心將折懷人首獨搔身如伏檻驥情似失林猱
涸轍將安往窮途况所遭幸今逢匠石直欲啖醪糟忖

已誠無有登門亦已叨沐薰良備至感激欲號咷已客
馮驩舍猶傷范叔袍鍰須開匣劒割欲試鋸刀杞梓容
山木包羞薦沼芼每思休困頓佳蔭有蘭草

送杜仲梁東游

仲梁先
稱善夫

野馬何決驟飛雲何悠颺商巖不足稽此士又欲東略
宋與梁青山不知老白山乃許忙菊潭之水清冷淵野
人飲之得長年芳醲不買壽淡泊差可久北山我我蒼
翠巔丹崖石老生紫煙靈芝秋杞老霜骨黃精茯苓飽

新斲望君斲斲病以癯酌之食之可以還膚腴況有劉
荊州元丹丘子寧舍之汗漫游涼秋佳月酒一杯送子
東下心徘徊半山亭前一茅屋歲寒霜勁君當來

短歌行送秦人薛微之赴中書

河流宿層冰山有太古雪翩翩有客來老面黑於鐵盤
盤胃臆間猶挂太華月不肯下貴勢便欲叫雙闕朔寒
衣裳單路遠馬蹶躓昔人丈夫事肝膽不可越我歌送
君行歌聲何激烈悲風為我起酒行歌半闋望君青雲

端何恤遠離別

關中行送李顯卿

關中行我持一杯酒送君西入秦秦川鬱相望渭水流
泫泫黃河中折倏復來太華倚天青壁開我送君兮渺
何許春風不肯吹君迴舉酒酌五陵浩歌登高臺終南
之山何崔嵬長安舊游安在哉百年繁華成劫灰千古
英雄沉草萊風塵瀕洞豺狼墓天地茫茫入煙霧我載
歌送君去太華終南宜有深絕處巖扃人跡所不到石

壁蒼苔老煙雨

缺

堂挂女蘿充腹多薯蕷玉井蓮開十

丈花茯苓根結千年樹白雲青松良可老虎門有龐商

有皓不然凌雲學輕舉呼取安期羨門語憶昨與君友

相逢日日酬杯酒酒闌起舞肝膽開小桃唱罷歌楊柳

晉語狎秦癩秦談驚晉叟秦晉之交那可無胡為不作

雙飛鳬碧草離離生早春哀歌望斷西南雲求君於終

南之上不得太華峰頭會見君

阻雪華下

愛山久成癖得山真雋永太華隔風塵五年夢幽境傳
聞十丈蓮擬扣玉仙井雪花忽迷漫蒼顙墮昏暝蹇余
世緣深方外久自屏意是希夷君俗駕踈造請行行風
撼林稍稍雲度嶺雲間三峰面隱約露芒穎初如灩澦堆
屹起勢奔猛漸如倚天劍萬仞鐵花冷煙霞半明滅瞬
息變光景乃知造化心相哀亦相警歸鞭晚怱怱回首
心耿耿浩歌夜深寒孤月挂峰頂

置酒半山亭得秋字

懷抱久不寫兀坐如繫囚永懷西山勝浩蕩成茲遊巖
壑互窈窕叢蘿鬱深幽飛煙入虛無長風跨崑丘楚句
散林莽商顏亦綢繆雷雨天地空景氣入夜浮況當節
律變萬物颯以秋雲來白日慘天澹清江流西望渺關
河沉沉生暮愁蘭苔暗幽谷芰荷老芳洲一笑舉酒觴
浩歌聊自酬幽賞興未極慨歎心悠悠世事蒼茫外寒
沙明白鷗

歸潛堂為劉京叔賦

逃淵魚深處避弋鴻冥飛古來賢達士亦復歌采薇南
山先廬在兵塵悵睽違山空無人居惟見草木肥翩然
千歲鶴一朝復來歸新築臨渾水行逕窈以微清流鳴
前除白雲入晨扉回顧陵谷遷萬事倏已非著書入理
奧得句窮天機前路政自迫此道儻可幾殷勤抱中璧
龜勉留餘輝第恐遯世志還負習隱譏永懷泉上石一
觴與君揮惜無凌風翰遐舉非所希

守約齋為呂仲和作

讀書不務博造道當入微一理貫萬理一歧會衆歧譬
彼庖丁刀騞然解牛時節間即有得肯綮寧復疑道喪
向千載聖遠孰可期養勇敢所愜養氣動以隨心非安
如山遇變鮮不移吾門有聖學觀心乃其師宴坐一室
中自得實在茲胡為滯紛感紉繹如繭絲人生矧多欲
事物日以滋牛羊踐徑蹊虎豹攻藩籬我嘗叩天理誠
明不容欺第恐達者事還為狷者嗤

楊將軍垌馬圖

古人相馬不相肉畫工畫馬亦畫骨淡淡生綃跡片雲
眼中羣龍何突兀飛菟汗血天冀種筆墨之間見飛動
前趨後逐互有態涉留行留分向背豐草長林性本真
駟駟駢駢相與馴開元天子盛監牧四十萬匹錦繡屯
人言息馬戰所重風鬣霜蹄惜無用君不見幽燕飛鞚
時中原流血成淵池祇令征討苦未休金鞍鐵甲彌山
丘安得放歸如此馬飲水求芻恣閒暇

題李氏寓酒軒

吾聞李謫仙一斗詩百篇酒家眠又聞楊諫議月廩盡
以送酒錢伯倫酒德頌無功醉鄉仙說到飲中理茲世
何渺然古來賢達士以酒全其天所以陶靖節浩歌歸
園田獨余醉翁之意不在酒樂在山水靜所便古人已
矣不可作今人紛紛亦能賢北里富熏天高樓歌舞筵
千金結客多少年哀吹豪竹倒傾玉船以酒互為市地
勢相婢媯焉知貧士貧到骨健倒仰天歌黃鵠黃鵠歌
罷無翼飛妻啼兒號書一束借問主人翁心跡誰與同

我亦頗解飲聖賢時一中酒酣擊尊破兩耳生春風安
得園綺過攜我入山去清泉為釀碧溪深醉卧溪頭弄
雲月

廬山兵後得房布白書知弟謙消息

聞道王師阻渭津廬山以後陷兵塵軍行萬里速如鬼
風慘一川愁殺人亂後僅知家弟在書來疑與故人親
夢中亦覺長安遠回首關河淚滿巾

晚步張鞏田間

金
卷一
地入荒蕪過客稀
村深門巷莫山圍
悠悠獨鳥穿雲下
策策寒鳥掠日飛
人事百年梧葉老
秋風萬里稻花肥
兵塵河朔迷歸路
惆悵平沙送夕暉

板橋道中

簟竹蕭蕭野水濱
光風過眼與時新
陰崖積雪猶含凍
遠樹浮煙已帶春
世故未應悲古道
歲華聊得伴閒身
歲芽筍稚行當好
莫擬山中問主人

過陝

萬古津茅據上遊
峭函西去接秦頭
悲風鼓角重城暮
落日關河百戰秋
形勝古來須上策
塵埃歲晚只羈愁
豺狼滿地荆榛合
目斷中條是故丘

為王德新壽

百年人物惜彫零
尚喜衣冠見老成
數口齋鹽憂桂玉
一川風雨獨柴荆
紅顏未羨方春好
黃髮應從此夜生
異日華林講殊禮
不妨鳩杖從公行

為秦人梁帥壽

功名萬里駕龍荒不作當年陞楫郎
顏角久瞻天上日鬢毛未點鏡中霜
衣沾暑雨千秋潤扇引薰風六月涼
見說長年出冲靜海山求藥本微茫

送申生取新赴中書

寒山漠漠日初曛過盡瀟瀟鴈鷺羣
百代高歌餘白雪一朝飛步上青雲
倚門骭髀誰憐我滿腹精神獨見君
看取扶搖便鵬翼臨歧且莫歎離分

寄杜仲梁

塞上愁多雲易陰故人雖在鴈無音
交情念子黃金重世故稽人白髮深
芳草春風千里夢青燈夜雨兩鄉心
岱宗入眼東南秀悵望雲山淚滿襟

寄元裕之

朔雲陰雪晚重重日入寒蕪塞草空
沂水東回無去翼天山南斷有哀鴻
三年遠別交情外一夜相思客夢中
明日關河對雙淚祇將幽憤寄秋風

竹林院同張之純賦二首

柳色侵尋映短籬竹梢零亂挂殘暉山禽自識忘機客
飛下庭柯更不飛

稍稍林間布穀聲邨南邨北水雲平偶來竹寺看山坐
閒聽清溪遶舍鳴

中書大丞相耶律公挽詞二首

甲辰五月
十四日

砥柱中流折藏舟半夜移世賢高允相人歎叔孫儀未
拜荊州面嘗蒙國士知無階陪引紼萬里望靈輜
文獻羣公表東丹八葉傳珪璋貽嗣德蘭藻霽遺編禁

籍虛青瑣神游定玉泉太常千字誅誰有筆如椽

密國公挽詞二首

鬱鬱佳城閉翩翩銘旌開風悲信陵墓雨入孝王臺萬
古傷渠壞千年望鶴來平明國門外簫鼓不勝哀

漢制隆恩禮周封列屏翰人知尊帝胄我但識儒冠零
落傷蘭桂孤高歎鳳鸞從今門下客長缺向誰彈

送李端卿之鄴臺

僮馬戒晨裝新霜木葉黃嗟余無壯節送子慘離腸林

慮荒秋色清漳下夕陽遙知一尊酒弔古鄴城傍

贈劉伯威

劉子山中秀相逢氣自同箕裘門戶計菽水古人風折
節豈為辱苦心應有終平生湖海志未用哭途窮

贈王明伯

遼海遺珠在黃華秀未空百年書法裏萬事酒杯中耿
耿此心在悠悠吾道窮好賢明達事獨喜與君同

秋夜感懷

老境歡娛少愁懷感歎長世途多險阻歸興渺蒼茫疎
雨梧桐夜西風蟋蟀牀平明攬青鏡衰鬢又添霜

雲中夜雨

憔悴杜陵客悲涼王仲宣四圍晴立壁一突午無煙病
卧秋風裏愁吟夜雨邊明朝誰裹飯萬一使君憐

渡洛

泉石經行久林立弭望間溪鳴風蕩水谷暗雨含山淡
淡輕鷗沒飛飛倦鳥還世緣良自苦空羨野雲閒

浩浩

浩浩春風裏悠悠倦鳥情
天寒花寂寞冰泮水縱橫
念遠心將折聞兵夢亦驚
江山憔悴久倚杖歎餘生

張宇石泉集

宇字彥升

缺

人號石泉先生

缺

送趙宜之歸辛安兼簡洛下諸友

悽惻復悽惻送君汾水側
人生歡會少一別難再得
昔經劫火然二鳥奮驚翼
嗷嗷各何之同落天西北
日夕

相和鳴此樂未易極狂風忽吹散一鳥歸故國翱翔入
寥廓萬里期一息鄧林有餘陰未肯棲枳棘玉山有嘉
禾未肯求粒食一鳥獨未歸毳毼老無力矯首思舊羣
潸然淚沾臆

雌雞行

雌雞粥粥將鳬兒鳬兒入水雞鳴悲岸南岸北飛且隨
但恐搏攫遭鳬鵠岸傍無食寧飢死朝暮不肯須臾離
傍人爭笑愚且癡我哀物理為人期

雲溪秋泛圖為閻國寶賦

晴嵐滴翠霜樹殷石錦錯落苔花斑人家隱約荒靄外
但見籬落連紫關兩山中斷忽空曠下有碧水之潺湲
幽人航葦迷遠近思致偃蹇無容攀定非鷗夷成霸業
一舸五湖煙浪寬又非坡仙遊赤壁酒酣浩歌江月寒
亦當拄杖橫膝看南山心與白雲相對閒胡為厭山瞰
芳渚岸草汀花適幽趣有聲詩畫無聲詩夏蟲未易寒
冰語或云此本張季膺蓴鱸忽憶扁舟輕褰余有家歸

未得一見秋風羽翼生

採蓮分得底字

溪風搖搖波瀾瀾十里芳華照清沚
蘭舟女郎紅玉春日射新妝
明水底芙蓉雙臉百媚生
吳宮西施漢良娣藕腸折斷雪絲牽
入手花枝香茫茫隔岸誰家貴公子
調笑新詞歌艷體吳儂變風有如此
誰念采蘋供祭禮

哭姪

學業方成二紀過虛舟一夕殞
頽波死皆有命憐渠早

金史四八
卷一
老獨無依奈我何歸計雲山空莽蒼愁懷日月暗消磨
白楊半夜風蕭瑟盡是吾兒薤露歌

感懷

世路羊腸劇險艱天心應厭著儒冠老無子息休心易
貧有交親託事難文字售人真滯貨廉平養已似閒官
義經讀罷無人會庭竹蕭森夜月寒

上巳日游平湖

微風漠漠水增波禊事重修繼永和脆管當筵清似語

扁舟爭岸疾如梭一時人物成高會千里雲山入浩歌
日暮芝蘭無處覓野花汀草占春多

送田茂卿赴都

宿雨初晴草木齊一杯汾水恨分攜上林曉色多鶯友
長路春風入馬蹄黃卷可能無斗祿青雲自是有天梯
從來俊傑知時務莫為寒牕故紙迷

和李子微邨居二首

健羨南溪老幽居水石間心無塵事汨身與白雲間院

靜深藏竹牆低易得山蒲團香一炷花落鳥喧喧

別墅荒城外居閒事事幽栽松添野色接鋤引溪流詩
社分新韻邨醪洗舊愁更求名與利騎鶴望揚州

送李仲暉之洛

同是思鄉客君先著祖鞭驪駒歌落日去鴈入高天莫
戀河濱粟當耕谷口田親朋儻相問為報已衰年

和劉敏之韻

城居寧不好未易著閒人客至慙無酒詩成莫療貧譚

天雖有口無地可安身
羨殺清江鷺生來不受塵

秋日出郭

離離禾黍滿郊墟
黍實紅殷接野閭
四十年來無史筆
有年今日仗誰書

和李濟夫韻

午夢遊仙鳥喚回
竹陰埽地淨無埃
莫言嘉客閒中少
時有清風自往來

荆公

作古非今禍已成亦知鬼責與天刑試看一病遺言處
猶勸傍人誦佛經

陳賡子颺集

賡字子颺

缺

人金河東山西道行中書省參議

北渡後與弟庚隱居不出以詩倡酬學者宗之

遊龍祠

黃河如絲導崑崙萬里南下突禹門枝流潛行大地底
派作八道如霆奔吾聞川真嶽靈有冥宰况乃利澤開

洪源神龍窟宅瞰平野千古廟貌何雄尊深林含蓄雷
雨潤冷殿似帶波濤痕我來南州走塵坭執熱未濯憂
思煩試斟甘冽洗肝肺一勺注腹清且燉悠然晞風坐
東廡倏見繪畫如飛騫仙官華裾乘朱軒旗纛掩謁蛟
伏轅雷公電母踏煙霧天吳海若驅鼉黿何時借取霹
靂手倒挽銀漢清乾坤廟前老翁顧我語孺子未易排
天閭胡為高論乃如此一笑滿面春風溫是時三月游
人繁男女雜還簫鼓喧寧焚沈玉答靈貺割牲醢酒傳

巫言巫言恍惚廟扉闔拜手上馬山煙昏

峴山秋晚圖

太山高嵯峨小山低嵒嵒清江錦樹帶秋煙煙際人家
在林藪荆河迤南三峴山此圖定繪襄陽否詩人翰墨
丹青手落筆天機隨所有峴首真在襄陽西遙觀漢水
含風漪上有龜龍一片石云是羊公墮淚碑試披禹跡
考地志畫師寧免詩人疑且看滿眼江山好休作燕人

過晉悲

子猷訪戴圖

兩晉崇玄虛風流變華夏舉世尙清談天地指一馬依
阿竹林賢鴻名重天下王郎衣冠胄亦復慕草野偶來
剡溪上溪水正清瀉扁舟信沿洄氣韻可瀟灑誰與好
賢心丹素入圖寫山陰懷古意欲攬不盈把賦詩心夷
猶六義愧騷雅西風塵冥冥儻有知音者

鐵拄杖

閩王鐵杖如桺栗得自荒虛鬼神域鞭笞蜚蠊今幾年

霧翳雲蒸老蛟黑腹中有筐如細泉牙節宛轉聲鏗然
天生神物不虛棄提攜萬里歸坡仙坡仙騎鯨凌紫煙
海仙一去今千年人間俯仰成今古紛紛長物何須數
洛陽銅駝卧荆棘昭陵石馬埋煙雨百斛鼎兩錢錐小
大用舍俱兒嬉商顏鶴髮一筇竹何似凌煙功臣玉具
高搢頤黃閣得君真耐久扶持四海經綸手會須拄到
崑崙巔九點青煙看九有鐵耶杖耶吾不知誠將道眼
窺天機一朝雷雨轟空陂須防化作蛟龍飛

武善夫桃源圖

武郎種桃滿雲溪三月紅雨行人迷自從玉勒入雲馭
春風杜宇年年啼飛黃騰踏有天倪紫電轉盼天山低
要將白壁沾蛾眉更把黃金鑄裹蹄羲和挾輶六龍馳
暮景恐迫虞淵西新詩擬喚槐安夢咫尺溪邊春色動
飛花漠漠水泠泠蒼苔荒了煙霞洞聞道西風解浣人
何處江山可問津征塵障斷仙源路且看丹青萬樹春

送李長源

月下孤鴻枕上鷄高城今日又分攜
九秋雲氣靖陵底萬里河聲砥柱西
飲罷關山秋寂寂詩成風雨暮淒淒
千金善保并州器要放崑崙入馬蹄

寄陝郡楊正卿

西菴二首

臨川堂上看飛鴻十載西州一轉蓬
親老家貧初有累才疎意廣卒無功
姦雄頗忌孔文舉富貴何如張長公
滿地塵埃浮世狹一帆思駕五湖風

遷客形容國士心春風鶴髮不勝簪
鍾儀去楚衣冠異

王粲依劉歲月深歲晚艱危無短策酒酣悲壯動長吟
遙憐蘭省楊夫子一紙書來抵萬金

宣宗挽詞

洛邑周初定蒼梧舜不還九天來鶴馭萬國泣龍顏儉
德高千古鴻勲際兩間無由望弓劍雲氣鬱橋山

寒食祀墳迴登臨西原廢寺二首

前朝廢寺枕山阿尚有摩雲宰堵波故國已非唐日月
老僧猶指晉山河年來筋力登臨倦亂後心情感慨多

石蘚荒碑碎文字他年更得幾摩挲

當年雲構倚天開一夕煙塵化劫灰
佛閣丹青餘瓦礫禪房花木亦蒿萊
春風萬里騷人怨落日千秋杜宇哀
斷礎荒碑無限意一章詩律為誰裁

送寇輔臣

古陌風塵點客衣送春君亦伴春歸
東風不管離人恨吹落楊花滿地飛

蒲中八詠為師品卿賦

蒲津晚渡

雲濤注壺口水府蟠九壘公子莫爭舟蛟龍方翫鼉

虞坂曉行

伯樂沉九原泥塗困騏驎千古長坂空無人知此意

舜殿薰風

巖廊鳴五絃薰兮南風來鳳去徽音絕胥井生莓苔

首陽晴雪

天風吹瓊瑤自冒首陽頂欲和采薇歌千山凍雲冷

東林夜雨

林壑冷含秋雨，雨黯如海。何如贊公房，青燈淡相對。

西巖疊嶽

梵刹盤空曲，煙霞錦繡紋。山靈儻招隱，徑入萬重雲。

媯汭夕陽

冀階降英皇，此地嬪有虞。南巡竟不返，愁雲接蒼梧。

王屋飛湍

縣流落雲巖，遙空挂飛練。何時鄭清冷，一類黃塵面。

陳庚子京集

庚字子京廩弟金平陽提舉

送麻信之內鄉山居

四海紛拏戰虎龍
驚膚無計脫圍中
莫貪利祿招時忌
要學鰲牙與世同
汝水應逢寒食雨
浙川行趁舞雩風
離心洗蕩方如許
莫上危樓聽斷鴻

弔麻信之二首

敝屣功名嬾著鞭
劇談豪放本天然
閒來每愛從人語

醉裏何妨對客眠
體瘁漸成中酒病
家貧全仰賣碑錢
堂堂一去今何在
三尺孤墳罩野煙

風采瓊林未足侔
一朝零落委山丘
君恩未賜金蓮炬
天闕俄成白玉樓
詩類貫珠尤可翫
室如懸磬更堪憂
路遙未暇憑棺奠
悵望中條涕泗流

答楊煥然二首

梁苑當年記盛遊
亂離南北恨遲留
且教紅袖歌金縷
莫對青山歎白頭
人似贊皇遷蜀郡
詩如子美到夔州

傳家況有玄文在應使童烏斷纂修

獻賦當年覲紫宸羨君藻思獨超羣扶持吾道難尤力
潤色斯文老更勤學際天人寧有伴文如風水自成紋
何時載酒清伊上寄字時來問子雲

清明後書懷

花氣薰人動竹齋貪春狂思若為裁蜂黏落絮飛還墜
燕認新巢去復來亂後精魂猶夢境貧中風景剩詩才
江山信美非吾土懷抱何時得好開

送孟駕之赴關

文史相從二十年，歲寒心事久彌堅。
向來才力驚游刃，此去功名穩著鞭。
淺綠每依沙漠草，橫青遙指拂廬煙。
應將萬字匡時策，挽取恩波下九天。

病後贈姚仲寬居士

寂寂柴關晝不開，虛簷獨步意徘徊。
百年素業南柯夢，一寸丹心古鼎灰。
野老相過聊問訊，溪禽近啄不驚猜。
好奇誰是劉公子，肯為揚雄載酒來。

有懷家兄子颺

蕭蕭雙鬢半成絲
疊疊襟懷抱所思
趨向自知違俗好
文章只合伴兒嬉
嵩西晚照霞明處
洛汭秋風鴈過時
中有仙人敝廬在
與君何日理茅茨

贈李彥誠

五嶽分崩四海傾
便宜一別盡今生
艱難契闊重相見
四十餘年老弟兄

峴山秋晚圖

當年叔子愛茲山陵谷回頭幾變遷縱使豐碑今尚在
遊人誰復一潸然

題師崑卿蒲中八詠

蒲津晚渡

中條山色照黃河競渡行人晚更多城上危樓倚霄漢
凭欄有客正悲歌

虞坂曉行

五更風露正清冥馬首殘蟾分外明好句墮前俄失去

微吟倏過古虞城

舜殿薰風

德化當年被海隅
熙熙物性盡昭蘇
不知今日吾民愠
一聽琴聲解得無

首陽晴雪

山頭晴雪照城樓
潑水融銀眩兩眸
蕩滌寒城須美醞
浮香醺醖夜來筍

東林夜雨

瀟瀟寒雨濕觚稜
古殿長廊夜氣增
此地此時誰得意
龕燈一點坐禪僧

西巖疊巘

螺髮煙鬟矗萬峰
行人指點梵王宮
鳥飛杳靄蒼茫外
人在霏霞空翠中

嬌汭夕陽

水曲山河古樂鄉
聖謨曾此降英皇
遺風欲問應無處
破屋頽垣半夕陽

王屋飛湍

表聖當年愛此山，倚樓終日看飛湍。
後人空飲貽溪水，不學先生便挂冠。

房皞白雲子集

皞字希白

缺

人自號白雲子，詩多別致如戊

子云行非楊秉三，無惑性似嵇康七。
不堪寄段誠之云，多語數窮深可戒。
虛名無用不宜貪，造語亦新時有涉。
腐氣類邵堯夫者，悉為汰去元。

遺山續夷堅志載希白家盧氏時客至烹一雞
其雄逸舍悲鳴三日不飲啄而死文士多為詩
文予號貞雞惜遺稿失傳

江上行

浮雲澹澹心悠悠杖藜來作江邊游商人打鼓催行舟
洪波不斷東南流水葉瀟瀟荆楚秋勸君休上王粲樓
日落滄江增暮愁

賣劍行贈韋漢臣

滄海波未澄無人斬長鯨韋郎三尺玉匣中鳴不平蛟
龍一出雷雨隨翕忽變化清四夷可惜有才不見用青
天白日將何為酒酣起舞抱劒哭肅肅悲風動茅屋不
如南山學種田自古青萍換黃犢

貧家女

貧家女德性溫柔寡言語終年辛苦不下機身上却無
絲一縷倡家兒女百不會只向人前賣嬌態繡襦端坐
青樓中銀燭熒煌照珠翠書言福善與禍淫未必天工

金史卷一百一十五
卷一
有此心盜跖長年顏子天古來顛倒非獨今高處是崑
崙低處是東溟崑崙推不倒東海填不平物之不齊物
之情貧女莫羨倡女榮不義富貴浮雲輕持身但如水
雪清德輝荆釵有令名

送王升卿

傷哉船子峰頭月昨夜團圓今夜缺月華猶是不長圓
人生安得無離別世上憂端千萬許惟有別離心最苦
盧川春晚送君行落花為我啼紅雨四海紛紛尚戎馬

我曹只合歸林下如椽大筆今無用日課新詩自陶寫
嵩陽佳處如罨畫浮可漁分田可稼我欲從君覓隱居
却恐山靈嫌俗駕

題呂仙亭

岳陽城南呂公洞道人見客無迎送事少方知日月長
身閒未覺功名重竹影松陰生午涼山色湖光設朝供
高吟下視世間人幾人不在黃梁夢

寄呈岳陽諸友

稟性太褊率不受塵事觸自小遠市廛僻居在巖谷人
間嗜好心舍書百不欲一飽更奚求簞瓢隨分足失脚
墮世路纏糾若微纒人以官為榮我以官為辱平生喜
高潔為官近卑俗平生喜曠達為官窘邊幅平生喜疎
散為官貴圓熟平生喜忠鯁為官多諂曲澆漓當此時
古道那可復鷓鴣巢一木偃鼠飲滿腹誰能朱門中區
區勾梁肉折腰趨下風不厭解印綬青山喚我歸早晚
謝羈束一尊石上酒浩歌對松菊

題張信之見山堂

自古朝市人罕與山相會山豈欲遠人人自與山背張
侯創新居正在闌闔內何以得青山坐上日相對胸中
有丘壑眼前無障礙人物既蕭散山不問內外晚來天
氣佳收目入清快乾坤無一塵草木有多態千里好風
來幾縷殘霞在拄笏當此時未覺功名大

慶王鼎玉生子

魏侯照乘珠卞氏連城玉此物豈易得君家貯滿屋平

生積德深天錫以多福熊羆入夢頻不待封人祝長者
已雄偉幼者更清淑指日看騫騰誰為犀角禿願君剩
買書學語便教讀斯文久不振六經要再續人生宇宙
間百歲一瞬速美惡暫時休何者為榮辱且引昔寧馨
逸院種松菊陶潛歸去來有子萬事足

次前韻寄王升卿

谷口人家十二三家家牕戶得晴嵐千障雲木秀而野
一脈流泉清且甘徇俗到頭終是病耽書自古不名貪

作詩為問東溪友樽酒何時愜笑談

贈趙山甫

寇盜連年劇蝟毛一身無處可奔逃
陳平自合西歸漢諸葛焉能北事曹
嗟我命兼才共薄仰君名與德俱高
幾時一笑滄浪畔右手持杯左手螯

哭楊叔能

仰看飛鴻俯看鱗訃來不覺淚沾巾
風塵末路尤多難山澤癯儒只合貧
亂後有誰收恨骨眼前無復見斯人

金史卷一百一十五
襄陽舊隱依然在花落空庭冷淡春

送李正甫九日韻

論著哀時總可哀不如且放笑顏開
留連風月憑詩句管領江山有酒杯
我欲處身如此處君言裁恨若為裁
從今但有錢三百相約高樓盡醉迴

憶新牆劉德淵

雲煙杳靄水微茫何處青山是岳陽
白髮滿頭空自老黃塵兩腳為誰忙
同盟鄂渚言猶在偕隱廬峰興未忘

近有倦遊詩數首西風吹不到新墻

思隱

得箇黃牛學種田蓋間茅屋傍林泉情知老去無多日
且向閒中過幾年詎道詘身俱是辱愛詩愛酒總名仙
世間百物還須買不信青山也要錢

寄王文炳

愛客孔文舉能詩陸士衡十年求識面千里飽聞名郁
郁芝蘭秀蕭蕭風露清幾時樽酒畔容我話平生

和楊叔能之字韻

遭亂重相見寬心不用悲江山佳麗地人物太平時
白蟻千家酒黃花九日詩鹿門不可隱吾道欲安之

丙申元日

三十八年過星星白髮多干戈猶浩蕩蹤跡轉蹉跎
世事堪長歎吾生付短歌江湖從此逝煙雨一漁蓑

辛巳巳東元日

舊日逢春喜而今怕見春紅塵長路客殘病老夫身
政

拙難書考家貧只累人自憐頭上髮更比去年新

秋夜

百計求安未得安此心須在鬢彫殘漫漫長夜渾無睡
蟋蟀堂深秋雨寒

自遣二首

幾見秋風幾見春一愁未已一愁新
聞中點檢平生事
唯有清貧不負人

瓮面浮香處處春任他時事百端新
自知野鹿山麋相



金
卷一
不是麒麟閣上人

別西湖

聞說西湖可樂飢十年勞我夢中思
湖邊欲買三間屋問遍人家不要詩

題張濟之勝覽軒

誰言山色可忘憂誰道澄江銷客愁
試倚闌干西北望浮雲依舊暗神州

讀杜詩三首

後學為詩務關奇詩家奇病最難醫欲知子美高人處
只把尋常話做詩

穹窿冥搜枉費功天然一語自然工況兼詩是窮人物
好句多生感慨中

千里奔馳蜀道難草堂賓主罄交歡怒冠三挂簾鉤上
誰謂將軍禮數寬

春日觀菜

手種蕪菁欲療飢春來頗怪發生遲東風貪長新桃李

未有功夫到菜畦

曹之謙允齋集

之謙字益甫雲中應人幼知力學早擢巍科既而與元好問同掾東曹機務倥傯商訂文字未嘗少輟北渡後居平陽者三十餘年與諸生講學一以伊洛為宗衆翕然從之文風為之一變所著古文雜詩僅三百首曰允齋文集汲郡王惲序之曰先生之作其析理知言擇之精語之

詳渾涵經旨深尚體之工刊落陳言及自得之
趣而又抑揚有法豐約得所可謂常而知變醇
而不雜者也

送梁仲文

聖人既已沒聖道遂不傳異端壅正途榛塞踰千年大
儒起相承闢之斯廓然濂溪迴北流伊洛開洪源學者
有適從披雲見青天我生雖多難聞道早有緣中歲苦
病目不得深窮研梁君河東秀氣意凌孤騫探道得奧

閭辨說如河縣所知非苟知而亦允蹈焉出入口耳者
彼我奚足言却來自秦京過我汾水邊未幾復言別長
途北之燕行看奮六翮高舉凌雲煙功成名遂後歸老
河之湍相從講聖學與子長周旋

感遇二首

中林有幽蘭羅生雜衆草地僻人不知芬芳空自好嚴
霜凋古木歲晚難獨保願充君子佩探擷尚未早安得
清風來吹香出林表

高林夾金井修竹連清池
梧葉既薺薺竹實亦累累
可棲復可食鳳鳥來何時
重華不得見韶樂何能為
日暮空歎息蕭瑟寒風吹

變白頭吟

梧桐不獨老鴛鴦亦雙死
靜女懷真心殉夫正如此
奈何及末流不知再醺羞
中路多反目幾人能白頭
君不見會稽愚婦輕負薪
不肯終身事買臣一朝歸
佩太守印悔望車塵那敢
近人生賦命自不齊貧賤
富貴各有

時隨雞逐狗聽所適世事悠悠爭得知

閒中作

雄雞啼一聲驚起五更睡出門何擾擾競逐名與利
冥冥車馬塵白日暗城市蕭條蓬蒿居獨有羲皇地
高情杳秋雲靜性凝止水俛仰天地間澹然無一事

東坡赤壁圖

先生矯矯人中龍京塵千丈不可容五年一夢落江海
翩然野鶴開囚籠雪堂閉戶讀書史興來飄然弄雲水

黃泥坂下醉三更赤壁磯頭航一葦明月清風共一江
邁往之氣無由降酒酣作賦記清賞袖有巨筆如長杠
一朝騎鯨尋李白人間俯仰成今昔續絃無處覓鸞膠
見畫思公空歎息

風雪障面圖

頑雲暗空雪正飛老木殭折溪流漸微
衰羸馬奈寒子便面障風何所之僕夫
徒行亦良苦吻噤不語心應語人生受
凍分豈無但願不作君家奴

秋日雜詩

山中有佳人考槃歌在澗
別來今幾時歲月忽已晏
相思不得書矯首望飛鴈

寄元遺山

詩到夔州老更工只今人仰少陵翁
自憐奕世通家舊不得論文一笑同
草綠平原愁落日鴈飛寒水怨秋風
黃金鑛裏相思淚幾墮憑高北望中

秋日懷李仁卿

獨倚斜陽百尺樓故人千里思悠悠
陶唐祠下煙光晚
姑射峰山鴈影秋
尊酒幾時同李白
雲山多處是并州
臨風惆悵無人會
一曲商歌寫暮愁

麻信之為壽

中州人物一元龍
卓犖英才硯磊胸
濁酒數杯遺世慮
清詩千首傲侯封
諸郎照眼三株樹
舊業關心五老峰
頭白他年賦歸去
綵衣扶杖看從容

送王仲通

從事西遊五見春
翩翩書記日爭新
懷鄉不作登樓賦
佐府真為入幕賓
世事忽驚翻手雨
馬蹄又踏化衣塵
古來燕趙多豪傑
定有飛書薦鸞人

上巳日感懷

舊游桃李浣丘塵
十六年悲客裏春
浮白可能澆魂魄
磊踏青聊且慰酸辛
蘭亭修禊人何在
庾信傷心賦又新
芳草喚愁花濺淚
東風回首一霑巾

白菊

數枝的皚照秋清何物為花乃寧馨玉骨冰肌誇皎潔
風瑤月珮想娉婷霜迎葉上迷青女露下籬邊泣素靈
見說寒英能愈疾擬開三徑著茅亭

紅葉

枝上萎黃慘未乾嚴霜一夕總成丹色烘曉日燕脂暖
影濯秋江蜀錦寒南鴈數聲催晚晚西風幾度見凋殘
橫山樓下梨千樹每憶童年九日看

北宮

金匱山房詩集 卷一
先泰門邊避暑宮翠華南去幾年中干戈浩蕩人情變
池島荒蕪樹影空魚藻有基埋宿草廣寒無殿貯涼風
登臨欲問前朝事紅日西沉碧水東

寄鄉中故人

十年夢繞故山薇世事悠悠與願違華表未成遼鶴語
青冥空羨塞鴻歸雲橫北嶺迷鄉眼塵滿西風浣客衣
為報吾州舊親識短書想慰莫令稀

送侯君美歸雲中

暫時相見又相違
留滯天涯更易悲
客淚清和秋雨落
鄉心杳逐朔雲飛
路經險阻行須穩
書報平安寄莫遲
邂逅故人如問我
為言貧病未能歸

自趙城還府

簡子城邊過盡春
却尋歸路並清汾
落花亂逐溶溶水
遠樹低連漠漠雲
姑射雨晴山似染
洞羊風暖草如薰
獨憐疲俗誅求困
愁歎聲多不可聞

讀唐詩鼓吹

傑句雄篇萃若林細看一一盡精深才高不似人間語
吟苦定勞天外心白璧連城無少玷朱絃三歎有遺音
不經詩老遺山手誰解披沙揀得金

弔王內翰從之

往年高步到瀛洲豈料東陵是故侯庾信竟歸周室老
劉楨真有岱宗遊山瞻斗仰名空在桂折蘭摧恨未休
鬱鬱佳城潯水上野煙寒草木經秋

上韓應州

天挺英雄入彀中堂堂自有古人風飛機力贊興龍業
唾手能收汗馬功四海威名方共仰一時才武更誰同
潁川不是留王霸行拜中書作相公

懷劉京叔

奕世金蘭契於今只有君英才殊落落餘子漫紛紛一
別幾春草相思空暮雲何時展良覲把酒共論文

宿雲臺觀

趨程疲永路記宿喜琳宮蓮嶽三峰對松林一徑通地

偏殘暑失境靜俗塵空入夜清詩夢山泉落枕中

中條阻雨

行李淹蒲坂歸期念晉州高風千葉下寒雨一山秋澗
響頻驚夢蟲聲亂入愁酒醒孤館裏心折大刀頭

初秋雨後

積雨蕩煩暑迴風吹早涼老苔翻舊碧病葉墮新黃久
客應吾道浮生半異鄉黑貂渾敝盡愁看一開箱

鴈

北塞迎霜雪西風送羽翰數行天澹澹萬里路漫漫日
落秋聲急江空暮影寒故人書斷絕矯首望雲端

幽居有感

閒居仍地僻門閉草萊深車馬無還往詩書有討尋嚴
霜催歲晚破屋覺寒侵計拙煩親舊誰能數賜金

秋風亭故基

危亭冠雉堞飛構何崔嵬一夕墮劫火變化成煙灰頽
基翳蓬蒿壞道封莓苔蕭條古城上空有秋風來

除夜

三十七年過勞生強半休此心耿耿吾道每悠悠感
物百憂集思親雙淚流春風添一歲又是五更頭

送李郭二子還鄉

喪亂身為客淹流淚滿衣亦知生處樂未卜有年歸祖
帳臨寒水仙舟漾夕暉春來一相送腸斷故山薇

中書耶律公挽詞

虎嘯龍興際乘時自有人風雲開慘淡天地入經綸忽

報台星圻仍傳薤露新斯民感無極灑淚叫蒼旻

應州廟學釋奠

夜色齋厨肅秋風殿宇清右文遭聖代備禮引諸生牢
醴嚴三獻豆籩陳兩楹祭餘同飲福旭日樹頭明

送李端卿東行

故人有所適驅馬出東城紅樹添秋色青山滿去程曾
為同省掾偏愴遠離情別後能相憶因風為寄聲

子猷訪戴圖

興盡空迴雪夜舟訪人虛語亦悠悠須知汾水多奇士
豈獨王家一子猷

梅影

隔牕渾似李夫人江月多情為返魂宛是依舊顏色
向人憔悴立黃昏

秋夜

寂寂江城夜向闌西風吹鴈叫雲端一聲遠過南樓去
月滿碧天秋水寒

臨潼溫泉

琢玉為池浴太真芙蓉花暖水生春誰知寂寞千秋後
留與行人洗路塵

長安早發

行李怱怱漚水頭雨餘涼氣動新秋五更馬上還家夢
先逐西風到晉州

秋夜聞笛

雲淨寒空月滿樓何人橫玉叶清秋梁州才罷伊州起

不盡關山此夜愁

廢宮

斷甓殘礎碎盤花
輦路荒涼蔓草遮
玉殿朱樓俱不見
壞牆巖嶙遶人家

過茹越嶺有感

山川良是昔人非
北望松楸淚滿衣
三十餘年成底事
全家南渡一身歸

蒲津晚渡

黃河城下水沄沄船去船來幾夕曛老盡津頭垂釣客
柳陰相對白鷗羣

杜瑛緱山集

瑛字文玉其先霸州信安人辟地河南緱氏山
中讀書講學博覽古今金亡間關轉徙教授汾
晉間中書粘合珪開府于相瑛赴其聘遂家焉
與良田千畝辭不受歲己未元世祖南代至相
召對見瑛身長七尺美鬚髯氣貌魁偉條奏從

容謂可大用命從行以疾弗果江南平詔徵之
辭不就左丞張文謙宣撫河北奏為懷孟彰德
大名等路提舉學校官又辭於是杜門著書至
元十年卒于家年七十遺命其子曰我死棺中
第置杜甫詩集一編題其誌石云處士杜緱山
墓天厯間贈資德大夫翰林學士上護軍追封
魏郡公謚文獻所著有緱山文集十卷金之將
亡也遺老儒碩皆來居相緱山而外如蒙城田

芝北燕劉驥永平王磐古鄭周子維武安胡德
桂渾源劉祁太原高鳴劉漢臣燕山尚子明林
慮張允中洛水徐世英李仲澤汴魏獻臣田仲
德郭謙甫各以經術教授互相提唱蓋彬彬乎
多文學之士亦一時之盛事也

弔故宮

月上觚稜椒壁濕飢烏啄碎琅玕石劫灰飛盡海揚塵
廢殿荒臺土花碧洛陽書生汴梁客一夜秋

一作春風頭

欲白尊中賴有酒如泉醉倚寒牕破愁寂

秋思

壯心忽忽劇懸旌秋氣能令客子驚白鴈不聞雲外過
清霜先向鬢邊生銅駝巷陌周東土金鳳樓臺鄴北城
千古繁華俱一夢空餘草木戰風聲

鄴南城

王氣銷沈井迳荒北風日夜刮枯桑殺飛天上河聲斷
犬吠陵頭日色蒼陸地百年滄海變西陵千古暮雲長

嗚嗚敕勒平川水寒遶陰山恨未忘

西陵

望眼憑高入杳冥偶隨飛鳥到西陵
波聲冷撼蒼厓石霜氣晨凝老樹冰
自謂摸金神可侮豈知破冢鬼還憎
却憐橫槩英雄志留與詩人說廢興

湯陰道中

城連蔓草就陂陀匹馬玄黃兩鬢皤
兔穴廢場新事改燕巢老樹舊恩多
嵇林鬼物防缺棘羨水天風鼓恨波

顧我本非塵土客
雲山隨意聽高歌

曉出相州

夢中鄉國血沾襟
愁裏光陰雪滿簪
客路風霜蕩水闊
詩囊塵土飯山深
花開自樂本無事
雲去復來猶有心
聞健擬從嵇阮醉
山陽暮雨竹成林

登古鄴城

杖底行雲拂古苔
袖邊風雨濕輕埃
風聲尉帥黃龍去
水勢朱家白馬來
往事無端隨世變
野花依舊向人開

空使羯奴誇壯健西陵草木為誰醒

白鳥飛邊望眼寬興來一吸酒杯乾
土花漬雨鐵梁澀蔓草接秋冰井寒
樹拂曉風搖北土水涵落日蹴西山
書生豈識興亡事片瓦摩挲認建安

征南口號

春早雲南麥已黃瀘江蒸霧水如湯
馬蹄半帶陰山雪變作人間六月涼

杜仁傑善夫集

仁傑字仲梁先稱善夫濟南長清人金正大中
嘗偕麻草信之張澄仲經隱內鄉山中以詩篇
倡和名聲相埒元至元中屢徵不起子元素仕
元任福建閩海道廉訪使仁傑以子貴贈翰林
承旨資善大夫謚文穆仲梁性善謔才宏學博
氣銳而筆健業專而心精平生與李獻能欽叔
龔禹錫京父二人最為友善遺山元好問送仲
梁出山詩有云平生得意欽與京青眼高歌望

君久其相契之深可知也

和信之板橋路中古風二首

斥風圻枯凌野日明遠燒山晚雲煙深遊子悲嶮峭平
王文字僻所歷入吟嘯急景不貸人佳處領其要

不杪來江光中途總消搖佳人在空谷尺素昔見招徒
石黃塵中媿爾漁與樵永懷梁父吟日暮風蕭蕭

髮黃有感

飄蕭中年髮既少何用白蒼黃未甚絲明知不更黑妻

孥恐生悲勸我課鉏耰摘眷然撫鏡鑷青山隨虛席

禹城道中

自於醯雞覆蓬心得少瘳乾坤一尺筆今古幾全牛歲
月憐丹竈雲山笑白頭此生真欲上何地不蒐裘

病中枕上

忽忽卧幾月遂成疎嬾名却因久病後更覺萬緣輕月
落牕影動夜寒燈暈生狸奴似相慰分坐守殘更

送信雲父

居士身輕日秋天木落時山青雲冉冉川白草離離涉
世心將破懷人鬢已絲相逢琴酒樂應怪久違期

病中憶坦夫兄

共脫壬辰亂他鄉見愈親論才唯有子知己更無人避
世相看老通家未擬貧竹林平日約早晚得為鄰

從軍

野闊牛羊小天低草樹平吳疆連晉境漢卒雜番兵月
合圍城暈風酣戰陣聲中原良苦地上古錯經營

雨中寄高無塵

久客饒孤悶連陰動浹旬行雲應已倦細雨亦傷頻飄
泊嗟吾道飢寒任此身人家酒應熟誰為問南鄰

雪後書事

雪罷山原淨日晴風景新一川花氣午萬壑水聲春天
地開華國關河失戰塵無邊春色裏惆悵獨行人

至日

松竹浣花里桑麻杜曲田蒼茫辭蜀地辛苦見秦天死

去誰憐汝生還事偶然但甘終壟畝待聘豈前賢

宿金線泉

官舍值淫雨客衣驚早秋
泄雲迷灌木行潦帶清流
蛛網翻新霽蟬聲咽暮愁
古今何限事白首對滄洲

中秋夜宿普照喜周卿至

久客厭孤寂跢然聞子來
夜涼風縮瑟雲破月徘徊
舊事休重說新詩且細裁
幾年無此夕獨欠兩三杯

無題

老淚河源竭憂端泰華齊苦吟知有恨細寫却無題事
與孤鴻北身攜片影西催歸煙樹外不用向人啼

滄浪亭觀雨

蕭蕭北風吹北牕浪浪秋雨瀉秋江癡蠅不飛集枯几
飢鼠屢出翻空缸雜花葉底開無數佳木門前立自雙
散地自知心地遠賞音誰解足音跂

病中呈裕之

十載猶能復笑談歸來重覓讀書龕未陽白酒君應具

勾漏丹砂我自慙民訟幾時消自苦一作古山城雖小得窮探也知清儉難持久好稱秋風醉菊潭

自遣二首

少日襟懷悔自豪暮年志節詎須高敢將議論輕疑孟閒得工夫細和陶酒盡枯腸還磊砢詩成白髮轉刁騷皇天汲汲誠何意也共人生一體勞

畚築家園手自操雖無多景足償勞十年種竹翻嫌密一日栽松恨不高是處求田消二頃尚誰有夢到三刀

得名身後良癡計盡擬浮沈付濁醪

讀前史偶書

楊彪不著鹿皮冠元亮還書甲子年此去亂離何日定
向來名節幾人全中原消息蒼茫外故里山河涕淚邊
六國帝秦天暫醉魯連休死海東孺

解嘲呈元明府

江氣冥冥江雨飛潛夫四月著冬衣野荼蘼謝薔薇發
山鷓鴣啼杜宇歸青鬢漸隨愁共減素心長與慢相違

四方餬口非君事自識飄零有是非

延津待渡寄仲溫參議

一望河平一慨然戰塵如霧水如天
要知別後思君處長在孤城落日邊

夜宿鄆城

殘月和燈照敝帷疎風乘隙入征衣
恰逢遠客思歸日正是家人說夢時

長門怨

天上神仙也別離人間那得鎮相隨
不須貴買臨邛賦
只想君王未見時

魯郊

六十衰翁更莫閒
好將華髮映青山
穆生自合尋歸計
不在區區醴酒間

楊雲鵬陶然集

雲鵬字飛卿汝海人
李內翰獻能欽叔工篇翰
而雲鵬從之遊
初得樹古葉黃
早僧閒頭白遲

之句大為獻能所推許從是游道日廣而學亦
大進客居東平將二十年每有所作必寄示遺
山元好問裕之以為知已有詩述二十首號陶
然集所賦青梅瑞蓮瓶聲雪意或多至十餘首
裕之序其詩萬慮洗然深入空寂盪元氣於筆
端寄妙理于言外貞祐南渡後詩學為盛洛西
辛敬之淄川楊叔能太原李長源龍坊雷伯威
北平王子正之等不啻十數人稱號專門就諸

人中其死生於詩者汝海楊飛卿一人而已

送王魏二學士應聘

三十年來只用兵蒲輪才始聘賢英已將藥石除危疾
政要文章致太平天子飛龍方啓運華陽歸馬豈無程
會須先下山東詔癘老思觀德化成

送元遺山

三館才名天下聞亂來俗議漫紛紜兩朝文筆誰爭長
一代詩人獨數君南浦春深愁送別西山晚翠約平分

何時並坐龍潭上野水添杯看白雲

至日二首

又見葭灰動一陽豈堪卧病客殊方老懷不似少年好
短景始從今日長黃犬既難遙附信玄龜何用苦支牀
恨無羽翼高飛去六六峰前望故鄉

恨初年少在南梁兄弟歡游久未忘春色共傾花底酒
雨聲常對竹邊牀怒鯨一夕掀洪浪斷鴈何時續舊行
辜負亂來同被約尺書不到十年強

送張雄飛赴河陽令

祖帳行將出汝州先聲已過孟津頭
鳴琴但要追循吏束帶何妨見督郵
二室風煙連赤縣三城鼓角隔黃州
遙知亂後農耕廢賣劍應須剩買牛

送張器玉歸閩中

十載流離避戰塵白頭憔悴始歸秦
霜前渭水有歸鴈亂後長安無故人
不憚北邙遷櫬遠莫忘東魯寄書頻
明年我亦崧南去擬買黃牛種汝濱

送殷獻臣北上

毳錦模糊覆橐駝駸駸征騎渡沙陀寒衝絕漠戎裝重
夜繞中華漢夢多詩健每因橫槩賦曲豪長愛擊壺歌
勒功會待平吳策萬仞西山尚可磨

送趙維道北上

干戈流落鬢毛焦千里窮途著弊貂老去少陵悲橡食
亂來王粲逐蓬飄朔庭雲漲龍沙冷南斗塵昏象闕遙
從此分攜相見少旅魂飛斷不勝招

秋晚登憲陵臺

落日荒陵百尺臺，登臨高興亦悠哉。
泰山雲盡千峰出，汶水霜晴一鴈來。
白髮還鄉惟有夢，青雲當路豈無媒。
布衣誰識新豐客，獨對秋風酒一杯。

真定龍興寺閣

挿天飛構鬱嵯峨，欄角濤聲轉暮河。
孤鳥去邊滄渚闊，落霞明處碧山多。
傷時未遂陳三策，弔古猶堪賦九歌。
安得天丁挽天漢，倒傾京洛洗干戈。

登濮州北城

層城高絕一攀躋，歲杪臨風客思淒。
燒入馬陵秋草黑，鴈橫雪澤暮天低。
陳臺事往人何在，曹國川遙望欲迷。
牢落壯懷誰與語，疎林殘照亂鴉啼。

白樂天影堂

晚慕浮屠半衲衣，至今高牖揭巖扉。
夢中身世元無有，壁上形容果是非。
但得蓬蒿猶可住，何須兜率是真歸。
渺茫兩地知何在，滿眼春波白鷺飛。

春日西城

山城二月媚晴暉
破暖輕風試袂衣
雨後杏花渾放盡
社前燕子尚來稀
孤懷不奈千秋積
往事真成一夢非
却羨西橋橋畔柳
年年翠色自依依

東原除夜

客舍無人靜掩扉
小牕燈火獨相依
一年殘臘今宵盡
千里故鄉何日歸
鬢髮半隨春雪白
交游渾似曉星稀
亂離不得中州信
腸斷雲間鴈北飛

春日游何氏園

旋引溪流環小苑出牆裊裊見長虹臨風遙聽有人語
隔水却疑無路通塵迹盡拋雙屨外春光別貯一壺中
當門羨殺南塘好擬買扁舟學釣翁

送演上人歸方山寺

為愛嵐光畫裏秋西風歸夢日悠悠卧雲未了三生債
飛錫何煩萬里遊山削碧城圍寺合泉鳴蒼佩入池流
遙知一室安禪處更在諸峰最上頭

送張漢臣歸保塞兼簡張萬戶

十年文筆遠從戎，藉藉名香幕府中。
鞍馬不教生髀肉，檄書端可愈頭風。
地連三趙山河壯，城鎮三關鼓角雄。
若見投壺祭征虜，為言白首坐詩窮。

送王希仲北歸

高歌行采北山薇，回首兵塵滿帝畿。
龍去鼎湖中國換，鶴歸華表昔人非。
後期何處傷心切，遠別從今見面稀。
莫道尺書千里隔，年年沙塞鴈南飛。

鴈

遠客思鄉未得歸，征鴻又見度斜暉。
黃蘆洲渚霜前至，紅葉關河畫裏飛。
別後望君消息久，亂來哀我弟兄稀。
憑高此日堪腸斷，那復江城擣暮衣。

劉辰翁須溪集

辰翁字會孟，廬陵人。年十七登陸象山之門。年二十四補太學生。宋景定壬戌年二十九廷試，對策忤賈似道，置丙第。以親老請濂溪書院山。

長江萬里陳宜中薦居史館又除太學博士皆
固辭宋亡托方外以歸隱居不仕元大德元年
卒年六十六會孟天資超特人物偉然以文章
居當世之第一流宋社既屋腸斷哀些投淚謳
吟積至萬首文祖先秦戰國莊老等書字體奇
逸自成一家有須溪集二百卷草廬先生吳澄
稱其文典雅溫潤明白敷暢讀之可見其為正
人非虛譽也

初晴

初日入高樓歸雲雜江樹魚遊新雨清鳥語晨光吐天
容起復覩煙色轉輕素牆草麗車前巷溝映泥路牕明
祛宿潤礎泣滑微步會朝有宿客過午無來屨沿砌上
蠟衣虛庭竿犢袴人生足無事世故非所慮彼語吾不
聞清風有時度

山行雨中二首

雨中如漏篷側身半車中風翻荷葉白難可為芙蓉向

來三重茅仰屋歎穿空已經亂離後去念常從容
入城過新雨路靜市人稀吾家林塘間水鴨狂欲飛門
闌稚子笑隔樹見翁歸何人無此樂顏暮樂知希

和答李德臣

忍寒一百五何開落息息華堂託孤根棄我荊棘中味
言隨時變茗薄酪自濃蚨蝶金縷衣更為悅已容雖無
蛾眉妒懷抱常沖沖

送李鶴田入浙趙春谷招

天下南北車書通行人點點過汴宮空餘艮嶽一拳土
黯慘如雪吹不融平乘樓上王夷甫一流中外淚如雨
西風羽扇不障塵更是蓮子隨

一作移

根去政事堂中三

相公徃徃退食如夔龍少年慟哭不見用一語不合面

發紅八年流落無處

一作死

所合眼當朝遽如許忠魂不

到海門潮別殿芙蓉廢為圃茫茫古路日平西不信金

銅不淚垂浮沉親故懶相

一作復

問白髮惟有春風知李

侯髀肉堪流涕同谷哀吟越州弟買絲刺繡刺未成公

子翩翩鴈書至飄飄起望白雲間
裘雪牛車度赤山年

餘七十能

一作會

幾見我且欲往窮當還平生高李經行

處寂寞斷橋漂落

一作亂

絮不知到日似枯魚淚入黃河

別魴鱖當空殿閣密雲團

一作屯

曾和薰絃接羽翰至今

尚留花石否杜鵑再賦長恨端蘇州正念東鄰女傷心

更

一作又

遇楊開府語言憔悴敢分明買酒行澆茂陵土

寄別孫潛齋

常笑唐衢生一慟可以死焉能流涕被面日日別知己

又常笑朝鮮無淚可沾巾
悲歌兩語為我吳婦人
平生鍾情重離別一聽陽關腸一絕
銅駝陌上會逢君誰料相忘如永訣
昔攜手青春春水一笑禊吏塵醉能強歌
醒能賦滿坐唯有孫堯文酒闌歌斷如轉燭
寒食累累新鬼哭丞相書桐異鳥巢曾園
仙市芳郊綠海棠三逕無根枝敗瓦頽垣亦已鋤
舊遊勿感有至此獨為吾黨權區區我欲與君重
一到化為長瓶酌荒草早知世事去如風
只為黃公壚下倒當時一醉鋪埋我不見興亡

應更好且復止此休云云我有臣子高能文令其講罷
日就君就君歸日誦所聞吾貧吾老不足念君鬚君髮
何年^缺幼安九十愁更愁空羨一生長樂傳嗚呼斯人
斯世不相見綠樹鶯啼淚如霰

文姬歸漢圖

鶴巢覆絕孔文舉錦衾裹葬楊德祖銅雀春風歌舞長
獨復悽然故人女故人有女勝無兒滿腹興亡身屬誰
琴燒笛折簾灰冷開卷草深歸鶴飢美人用事單于國

細馬駝金為余北曾從過鴈借書看又向枯魚寄聲得
胡笳日聽心自哀天遣前朝漢使來穹廬抱子送于野
欲去欲往真難哉大兒牽衣小兒乳割乳分攜淚如雨
跂馬兒啼漸不聞腸斷一如初遇虜畫圖巧畫欲無聲
不盡賢王子母情踟躕拳跼各有態未必日莫分馳能
天長地久何終極事已不堪回首覓草無南北是青青
雲有朝昏長暮暮琵琶恨絕妒難消海上羗兒夢豈遙
入見玉關天似錦歸從金馬晚當朝容儀憔悴思無骨

記問荒唐存又沒衛郎去我墓何斯魏史親人禮難越
當時一女贖元身亂代流離更可聞天南地北有歸路
四海九州無故人

讀杜拾遺百憂集行有感

余生行年將六十不知何者為憂戚富貴不驕貧賤安
以此存心度朝夕往年承乏佐中書大官羊膳供堂食
只今賜老作編氓衣食信天無固必陋巷簞瓢如素居
不管茅茨春雨濕門前載酒求賦詩錦軸牙籤日堆積

在官不置負郭田既老翻得稽古力毀譽都忘月旦評
姓名不上春秋筆朝米不煩鄰僧送暮米不煩太倉糴
我亦一飯不忘君文人相輕所不及傷哉白首杜拾遺
入蜀還秦勞轍迹文章蓋世亦何為妻子相看百憂集

贈製筆生許文瑤

許生精藝誰可及材用剛柔以製筆水盆洗出紫兔豪
便覺文章生羽翼蒙恬將軍為動色為是秦王舊時物
丞相斯曾從駕行載此篆書封禪碣從秦至今幾千載

兔尚存皮竹可採利濟天下功不有入手千人萬人愛
我昔為郎居粉署用筆唯于許生取輕衫日對紫薇花
寫遍江淹夢中句

蘇李泣別圖

事已矣泣何為蘇武節李陵詩噫

龍霧洲雪

此處幾人行隔波搖暮晴洲迴江似玦山遠雪如城離
合看雙櫓荒寒又一程今年梅未醉最覺別來輕

夜雨

夜半起雷車
天門報曉衙
何消如此雨
又有未開花
繡被人中酒
茅簷客夢家
一晴天地闊
稽首見重華

周耐溪訪

麥逕紫紆縮
寄蝸傳呼驚
倒望前牙能
忘特進羣公表
來訪尋常百姓家
草市波喧騰
騎竹柴門路
隘簇鞍花
屏窺不信雌
同甲為倍高明
兩鬢華

清明日偶成

海日高高天欲斜
斷橋無復聽嘔啞
墓中酩酊已千載
陌上清明有幾家
已老愈疎惟酒盞
更晴相看是梅花
年年春怨深如昨
莫把無涯恨有涯

戲題

無人知坦腹水影半簾苔
驚謂青蟲墮垂絲忽上來

春歸

留春一日不可種樹十年未成芳草
斷腸花落綠牕攜
手鶯聲

漁歌效陳自堂作

石頭城落淮水劉郎浦對伍洲越沼吳湖安在月明人

唱湖州

春晴

江柳長天草色齊新晴何物不芳菲無因化作千蝴蝶

西蜀東吳款款歸

一作飛

新燕池塘綠雨肥初晴未暖日光微角巾猶帶花梢濕

纔倚闌干見絮飛

探梅四絕

江天欲雪未雪時絕江探梅驢倒騎空中著我方成畫
亂後逢花且賦詩

釣天遠遠月斜斜歸客迢迢未到家一色白雲天似雪
和衣和雪宿梅花

後五百年無放翁狂歌醉舞與誰同漁人入得桃花洞
猶有梅花路未通

冷蕊何心識老逋芳名從此落西湖風霜未改幽堅操

弟立花前諱玉奴

題宣和雙蟹圖卷

講餘機暇諫書空
艮嶽江湖入眼中
郭索能令天一笑
畫圖何必面春風

劉主簿將孫

將孫字尚友別號養吾辰翁子少質魯長而穎
悟過人為文較辰翁愈奇崛皇慶癸丑薦授光

澤一作將樂主簿草廬先生吳澄題其集曰國初廬

陵劉會孟氏突兀而起一時氣燄震耀遠邇鄉
人尊之其子尚友式克嗣響會孟詵變化而
尚友浩瀚演迤論者以為尚友之嗣會孟不忝
子瞻之嗣明允也

別蕭高鳳

惜與可人別又貪歸路長人生有離別吾事屬閒忙沽
酒澆芳草垂鞭看夕陽眼前聽鶴語世路劇茫茫

送錢方立遊荆二首

峴山西上楚天頭
書劒區區事遠遊
歲月如流方作客
江山信美莫登樓
百年耆舊誰家傳
一代衣冠又古丘
亂後題詩詩即史
未應輕付水東流

不辭跋涉恨崎嶇
如此飄飄一丈夫
新雨驚秋鳴草樹
行人隨鴈落江湖
歲年寧向長途老
天地何堪一室拘
幾世中原今復古
更陪九石作鵬圖

元詩選三集卷一